

26/02/1999

Generasi muda diharap jalin hubungan mesra

KUALA LUMPUR, Khamis - Pergerakan Pemuda Umno berharap generasi muda di Malaysia dan Singapura dapat menjalinkan hubungan lebih mesra bagi memastikan masa depan yang lebih mantap di rantau ini menjelang alaf baru.

Perkara itu akan dikemukakan oleh pemangku ketuanya, Datuk Hishammuddin Hussein, apabila bertemu dengan Perdana Menteri Singapura, Goh Chok Tong, di republik itu esok.

Beliau akan berada di Singapura bagi mengiringi Menteri Besar Johor, Datuk Abdul Ghani Othman, yang akan menghadiri majlis sambutan Tahun Baru Cina yang diadakan Goh.

Sudah menjadi tradisi bagi Menteri Besar Johor menghadiri majlis itu setiap tahun.

Hishammuddin berkata, sudah tiba masanya rakyat Malaysia dan Singapura melupakan segala pergeseran dan perasaan tidak puas hati yang dialami sejak beberapa tahun lalu, sebaliknya mula menjalin hubungan lebih erat.

"Sebagai Pemangku Ketua Pemuda, saya prihatin dan sentiasa mengawasi hubungan Malaysia-Singapura ini kerana sama ada kita suka atau tidak, sejarah antara kedua-dua negara ini sungguh rapat.

"Pemimpin muda kedua-dua negara mesti mewujudkan landasan yang lebih kukuh. Kita patut menjadikan sikap serta kejadian masa lalu sebagai pengajaran," katanya ketika dihubungi di sini hari ini.

Hishammuddin berkata, antara perkara yang akan disuarakan dalam pertemuan dengan Goh ialah pendirian Pemuda menyokong keputusan Perdana Menteri, Datuk Seri Dr Mahathir Mohamad, yang mencadangkan semua masalah antara kedua-dua negara diselesaikan melalui satu pakej.

Menurutnya, cadangan itu adalah penyelesaian terbaik, terutama ketika kedua-dua negara bersedia menghadapi cabaran lebih besar dalam melangkah ke alaf baru.

Hubungan Malaysia-Singapura agak dingin sejak beberapa tahun lalu berikutan timbul beberapa isu, termasuk arahan Singapura supaya Malaysia memindahkan pusat pemeriksaan Kastam, Imigresen dan Kuarantinnya (KIK) dari Stesen Tanjung Pagar ke Woodlands, pencerobohan pesawat republik itu di ruang udara negara ini serta isu bekalan air ke Singapura.

Bagaimanapun, ketika menghadiri Sidang Kemuncak Asean di Hanoi hujung tahun lalu, Dr Mahathir dalam pertemuannya dengan Goh mencadangkan kedua-dua negara menyelesaikan semua masalah berbangkit dalam satu pakej lengkap.

Pegawai Kementerian Luar kedua-dua negara kini dalam proses merangka pakej itu.

(END)